



Ljepote islama (Meka)

Hatib: dr. Bender ibn Abdulaziz Belile

29. džumadel-ula 1444. po Hidžri / 23. decembar 2022.

Allahu se zahvaljujemo, moleći Ga da nam poveća blagodati i sačuva nas teških iskušenja i strašnih kazni, i uzdigne nas, zbog naše zahvalnosti, do najviših deredža. Svjedočim da nema boga osim Allaha, jedinog, Koji nema druga, svjedočenjem onoga koji vjeruje u Allaha i ustrajava u svom vjerovanju, i svjedočim da je Muhammed, sallallahu alejhi ve sellem, Njegov rob i poslanik, koji je dostavio vjerozakone i propise i objasnio halal i haram, neka su na njega Allahova milost, spas i blagoslov, i na njegovu plemenitu porodicu i njegove časne ashabe, tabiine i sve one koji ih slijede u dobročinstvu do Dana proživljenja i stajanja pred Njim. Oporučujem sebi i vama bogobožnost. Bojte se Allaha, Allah vam se smilovao, bogobožnost je svjetlo u tami, bistrina u mislima i veza koja se ne može raskinuti.

O muslimani, najveća i najplemenitija blagodat koju čovjek može dobiti od svoga Gospodara jeste blagodat dini-islama, poveznica i kruna svih vjera, pečat i kruna svih vjerozakona, Allahov pravi put.

Uzvišeni kaže: "Allahu je prava vjera jedino – islam." (Alu Imran, 19)

"To je jedino prava vjera, ali većina ljudi ne zna." (Jusuf, 40)

Pripadnost islamu je ponos i čast, a život u njegovom okrilju je smiraj i čistota za dušu. Uzvišeni kaže: "Ko je bolje vjere od onoga koji se iskreno preda Allahu, čineći još i dobra djela." (En-Nisa, 125)

Suština islama ogleda se u predanosti Allahu, Jedinom, negiranju postajanja drugih bogova osim Njega, čvrsto ubjeđenje da je On Stvoritelj kosmosa i da upravlja svim Svojim stvorenjima, potvrđivanje Njegovih lijepih imena i savršenih atributa, Njegovo veličanje i poniznost pred Njim i pokoravanje Njemu i Njegovom poslaniku Muhammedu, sallallahu alejhi ve sellem. Temelj na kojem čvrsto stoji je jasna Knjiga





i spuštena Opomena, Allahov govor kojem je laž strana, bilo s koje strane, kao što kaže Uzvišeni: "Elif-lam-ra. Ovo je Knjiga čiji se ajeti pomno nižu i od vremena do vremena objavljuju, od Mudrog i Sveznajućeg" (Hud, 1); "Mi tebi objavljujemo Knjigu kao objašnjenje za sve i kao uputu i milost i radosnu vijest za one koji jedino u Njega vjeruju" (En-Nahl, 89).

O vi koji pripadate odabranom ummetu, istinoljubivost je obilježje islama, istina je njegov plašt, mudrost je njegov vodič i bajrak, milost je njegova duša i cilj, dobrota i dobročinstvo su njegovo djelo, njegovi propisi i vjerozakoni su najispravniji i najmudriji, u njima nema nikakve poteškoće i njima se postiže čistoća i dobrota duše. Uzvišeni kaže: "A ko je od Allaha bolji sudija narodu koji čvrsto vjeruje?" (El-Maida, 50)

"On vas je izabrao i u vjeri vam nije ništa teško propisao." (El-Hadždž, 78)

"Allah želi da vam olakša, a ne da poteškoće imate." (El-Bekara, 185)

Dozvolio nam je lijepe stvari, u jelu, piću, odijevanju i međuljudskim odnosima, zaštitio je naše temeljne vrijednosti, interese i potrebe, a zabranio nam je ružne stvari i nanošenje štete sebi i drugima, u svakoj situaciji.

Islam propisuje lijepo ponašanje i podstiče svoje sljedbenike da se bave uzvišenim stvarima. Vjerovjesnik, sallallahu alejhi ve sellem, rekao je: "Poslan sam da upotpunim plemenite ćudi kod ljudi." (Ahmed) I rekao je: "Allah voli uzvišene stvari, a prezire niske." (Taberani i Hakim)

Islam čuva i štiti svačija prava, i propisuje brigu o preuzetim emanetima. Naredio je dobročinstvo prema roditeljima, održavanje rodbinskih veza, gostoprimstvo, dobročinstvo prema komšijama i pomaganje potrebnih.

Vjera koja poziva u međusobno pomaganje, ljubav i zajedništvo, a zabranjuje podjele, svađu i razilaženje. Uzvišeni kaže: "Svi se čvrsto Allahova užeta držite i nikako se ne razjedinjujte!" (Ali Imran, 103) Poslanik, sallallahu alejhi ve sellem, rekao je: "Vjernici su poput građevina, jedni druge podupiru." (Buhari i Muslim)





Islam je vjera truda, odlučnosti i zalaganja, a ne vjera slabosti, oklijevanja i lijenosti, objedinjuje potrebe duše, srca i tijela, i uspostavlja ravnotežu između ovog i budućeg svijeta.

Uzvišeni kaže: "I reci: "Trudite se! Allah će trud vaš vidjeti." (Et-Tevba, 105)

"... i da je čovjekovo samo ono što sam uradi, i da će se trud njegov, sigurno, iskazati."
(En-Nedžm, 39–40)

"... i nastoj da time što ti je Allah dao stekneš onaj svijet, a ne zaboravi ni svoj udio na ovome svijetu." (El-Kasas, 77)

Vjerovjesnik, sallallahu alejhi ve sellem, rekao je: "Nastoj da radiš ono što će ti koristiti, i traži pomoć od Allaha." (Muslim)

Uzvišeni kaže: "Sada sam vam vjeru vašu usavršio i blagodat Svoju prema vama upotpunio i zadovoljan sam da vam islam bude vjera." (El-Maida, 3)

Bojte se Allaha i znajte da je vjera islam najočigledniji dokaz da Allahu, Jedinom, i nikome drugom, pripada apsolutno savršenstvo, potpuna mudrost i znanje, kao i dokaz veličine Njegovog Vjerovjesnika, sallallahu alejhi ve sellem, i da je on uistinu Allahov poslanik.

Ne postoji niko bolji od onoga koji se Allahu pokorava, čini dobro Allahovim robovima, ustrajava u Allahovoj vjeri, svoje srce ispunji iskrenošću i vjerom u jednog Boga i svoje ponašanje i djela uskladi sa zahtjevima vjere i pravog puta. "Allah je nas uputio, a zar ima ljepše upute od Allahove? Mi se samo Njemu klanjamo." (El-Bekara, 138)

